



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8



NE nung ali hectare lakh 2 nung rubber alu ayimtsü

Pakistan-i US aser China na tesendaktep yanglushitsüner



VOL. XIX NO. 64 (ADOK 64) DIMAPUR KÜPTOKNÜ (SATURDAY)

LUCHII (DECEMBER) 11, 2021

₹ 5.00

NLA indang BAC senden ayonger

Dimapur, December 10, 2021 (TYO): December 20, 2021 nungi 13 buba Nagaland Legislative Assembly indang terbuba Session (Emergent Session) agitsü aliba atema Business Advisory Committee (BAC) senden ka amentsü jateper.

December 16, 2021 nikongdang 1:00 ako nung Committee Room, Assembly

Secretariat nung senden amentsü aser idangji Provisional Programme yanglutsü ta Nagaland Legislative Assembly Speaker aser BAC Chairman Sharingain Longkumer-i ashi.

Iba senden nung BAC züngsem ajak adentsü mepishir ta Commissioner & Secretary, Dr. P. J. Antony-i sangdong ka nung metetdaksüogo.

COVID-19 Nagaland: 3 dak putet & 7 taneptsü angu

Kohima, December 10, 2021 (TYO): Nagaland nung Hokolbarnü nisung 3 dak COVID-19 putet aser nisung 7 taneptsü angu.

"Tanü Kohima nung nisung ana aser Dimapur nung nisung ka dak COVID-19 putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

Tanü COVID-19 puteta alir nisung 7 taneptsü angu. Parnokji Dimapur nung 5 aser Mokokchung nung ana lir. Nisung 32,146 rongnung nungi 30,275 taneptsü nguogo aser ibaji taneptsü angur 94.17% lir, ta pai metetdaksü.

Tang nisung 106 anepaludar saka parnok 87 dakbo shirangba

yimya kecha mali ta paisa shisem.

"Brihostibar tashi nung nisung 749,454 nem COVID-19 vaccine indang dose 13,09,884 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,982, healthcare workers 16,003, arishi küm 45 ser temapur 211,737 aser arishi küm 18 nungi 44 tsüingda alir 460,732 lir, ta pai ashi.

"Vaccine agirtem rongnung nisung 560,430-i dose anaprong agiogo. Parnokji frontline workers 48,559, healthcare workers 13,526, arishi küm 45 ser temapur 175,564 aser arishi küm 18 nungi 44 tsüingda alir 322,781 lir" ta Dr Thurr-isa ashi.

Nagaland nung SARFAESI Act mapa tenzükogo

Kohima, December 10, 2021 (TYO): Nagaland nung SARFAESI Act 2002 mapa kuma tenzükogo ta state sorkari metetdaksü.

"Indian Constitution nung Arrla 371A (1)(a)(iv) nung lateta aliba ama Nagaland Governor-i iba sangdong agütsüba anogo nungi Nagaland nung Securitisation and Reconstruction of Financial Assets and Enforcement of Security Interest (SARFAESI) Act, 2002 mapa tenzükba osang

metetdaksür" ta Additional Chief Secretary & Finance Commissioner, Sentiyanger Imchen-i ashi.

Nagaland Land and Revenue Regulations (Amendment) Act, 2002 nung lateta aliba ama bank aser senotsü rejutemi agiba kiojen-kimungtem Nagaland nung lisopurtem dang dang yokdoktsü, ta Sentiyanger Imchen-i sangdong nung ashi.

Nagaland Assembly winter session alidang November 26, 2021 nü Arrla 371(A) den külemi

Nagaland nung SARFAESI Act mapa tenzüksü bangzüngtep.

Nagaland nung iba Act mebenokba ajanga bank aser senotsü rejutemi loan atema kiojen aser kimungtem magizük.

Ajsüaaka, state sorkari Assembly nung iba bangzüng magitepdang state level bankers committee den senden aika amen aser idangji bank dang sen apuba meyipa magütsütetba atema kiojen-kimungtem lisopurtem dang dang ayoktsü angatettepa liasü.

Bank temi Dec 16 & 17 anogotem lungkak aittsü

New Delhi, December 10, 2021 (Agencies): Bank telok 9 longjemer tentetba United Forum of Bank Unions (UFBU)-i December 16 aser 17 anogotem linük ajunga mokdangtsü ayogzükogo.

Centre sorkari public sector banks pirvatisé asütsüba sentong anema parnok lungkak aiter. Parliament indang Winter Session nung Centre-i Banking Laws (Amendment) Bill 2021 benoktsü.

Iba Bill indang nükjidong ya public sector bank ana nija akümtsüba indang lir. Iba atema Banking Companies (Acquisition and Transfer of Undertakings) Acts, 1970 aser 1980 den Banking Regulation Act, 1949

yanglushitsüsa akümer.

Centre sorkari bank privatize asütsü lenmang lapoktsü atema Parliament indang session nung Banking Reforms Bill benoka agizükünür ta UFBU convener Mahesh Mishra-i ashi.

"Sorkari public sector banks ana aser general insurance company ka privatize asütsü lemtego ta osang angazüker. Bank aser insurance company temi nübor sen amshir aser nija akümba tetezüji nübor senji nija keti aoba lir" ta paisa metetdaksü.

"Company aser teloktemi loan meyipa magütsüba aser bank nung NPAs teimba akümer. Sorkar parnok dak mapa inyaksü melena Assets Reconstruction Company mesüra Bad Bank nem

agütsünür. Iba ajaanga nija company aser teloktem dang ajangzüksü kechiyong parnok sen apuba ola madoki agientsü" ta UFBU convener Mahesh-isa metetdaksü.

"Iba jagi United Forum of Bank Unions-i lungkak aittsüsa akümer" ta paisa shisem.

Kasa mapang, industrialist temia anog ananü bank shibangtsü ayongzükba atema tebilemstü khuret lemsatepogo.

"Bank ajanga anogoshia Rs 300 nungi Rs 400 crore shi benteper. Anungji bank shibangba ajanga mapa nung tetsükdaksü ajurutsü aser senotsü bentepba nung kongshitsü" ta FOPISA president, Badish Jindal-i ashi.

CDS General Bipin Rawat mang rongdokogo

New Delhi, December 10, 2021 (Agencies): Hokolbarnü India nung mezüngbuba Chief of Defence Staff (CDS) General Bipin Rawat mang rogdokogo.

General Bipin Rawat aser pa kinungtsü Madhulika Rawat na indang mangji New Delhi nung aliba Delhi Cantonment nung rongdoka liasü. Tena jala ana-Kritika aser Tarini nati mang dak mi senoktsü.

General Rawat nem 17-gun salute agütsü aser services 3 nungi buglers-i Last Post and Rouse atem.

Iba sentong nung lennir aikati General Rawat nem akhüm tetushi agüja aden.

Ano, linük balala nung Defence attaches-ia CDS General Bipin Rawat nem tetushi agütsü.

Ambassador of France to India Emmanuel Lenain aser British High Commissioner to India Alex Ellis natia General Rawat aser pa kinungtsü Madhulika nem tetushi agütsü.

Arishi küm 63 tain General Bipin Rawat ya Indian Army nung four-star General ka liasü aser January 2019 nung pa ya India nung mezüngbuba Chief of



Defence Staff (CDS) inyaksü shima liasü.

Pai CDS meinyakdang Chiefs of Staff Committee indang 57 buba aser tatembangba Chairman inyakba den Indian Army indang 26 buba Chief of Army Staff inyak.

Pa ya March 16, 1958 nü Uttarakhand kübok Pauri nung Hindu Garhwali Rajput'er kibong ka nung aso.

Asür Rawat'er kibongi putu aika Indian Army nung tenzüka arur.

Rawat tebu Laxman Singh Rawat ji Indian Army nung Lieutenant General liasü.

Rawat-i Cambrian Hall School, Dehradun aser St Edward's School, Shimla, Himachal Pradesh nung azüng. Iba sülen pai National Defence Academy (NDA) aser Indian Military Academy (IMA) nung azüng aser idangji pa nem "Sword of Honour" agütsü.

Rawat ya Defence Services Staff College (DSSC), Wellington nunga graduate ka liasü aser United States Army Command and General Staff College nung Higher Command Course agiogo.

DSSC nung azüngba ajanga pai Defence Studies nung MPhil degree nguogo. December 16,

1978 nü Rawat ya 11 Gorkha Rifles indang 5th battalion nung shimok.

Colonel ka ama pai 11 Gorkha Rifles indang 5th battalion nung commander inyak. Ibaji Arunachal Pradesh kübok Kibithu nung Line of Actual Control (LAC) nung liasü.

2019 nung General Rawat ya United States Army Command and General Staff College International Hall of Fame nung züngsema liasü.

Ano, pa ya Nepalese Army nunga honorary General ka liasü.

Küm 43 tashi Indian Army nung tenzüka arudang pai sempet

aika agizükogo. Sempet aika rongnungi kar- Param Vishisht Seva Medal, Uttam Yudh Seva Medal, Ati Vishisht Seva Medal, Yudh Seva Medal, Sena Medal, Vishisht Seva Medal, anaben tashi COAS Commendation aser Army Commander's Commendation.

IAF-i tri-service Court of Inquiry tentetogo:

December 8, 2021 nü Mi-17v5 helicopter lendong atalokba atema Indian Air Force (IAF)-i tri-service Court of Inquiry ka tentetogo.

December 8 nü Tamil Nadu kübok Coonoor nung lendong atalokdang Chief of Defence Staff (CDS) General Bipin Rawat, pa kinungtsü aser sepai 11 asü.

"IAF-i helicopter lendong atema tri-service Court of Inquiry ka tentetogo. Parnoki tekaratiba nung bushisingdang osang agütsütsü" ta IAF-i metetdaksü.

Brihostibarnü IAF helicopter indang black box ta ajaba flight data recorder (FDR) ngutetogo.

Iba black box ajanga ledong atalokba kuli tejangja angutsü.

HIV, TB & Blood donation awareness campaign ayonga agi



Dimapur, Luchii/December 10 (TYO): National AIDS Control Organization (NACO), Ministry of Health and Family Welfare Government of India-achaayanga linük ajunga nung October 12 nü New India @75 -Azadika Amrit Mahotsav campaign tanabuba shilem amenoka liasü. Iba sentong ya HIV, TB aser Blood donation dak sendakba nung awareness campaign ayongzüka agitsü atema amenok. Campaign ya HIV/AIDS aser TB agi tonger alirtem mesenmetui amshiba tajemba kümdaktsüsü atema HIV/TB prevention aser services tem dak sendakba nung tangazükba agütsüsü aser azü tenlatsü atema lanurtem ajungmesotsü nükjidong nung tenzük.

Dimapur Deputy Commissioner, Rajesh Soundararajan, IAS mendenbuba aser Member Secretary Dr. I. Moatemjen, CMO, Dimapur na lenisüba nung District Committee-i, district jenjang nung iba campaign tanabuba shilem

tenzükja liasü.

Awareness campaign tanabuba shilem ya District AIDS Prevention & Control Unit (DAPCU) aser District Tuberculosis Officer, Dimapur nungeri anir October aser November ita agiogo. Parnoki Dimapur district kübok school aser college balala nung HIV, TB aser Blood donation awareness camp tem ayongzüka agi.

Awareness campaign tanabuba shilem nung Dimapur Government College, Golden Crown College, St. John College, Mt. Mary College, Eastern Christian College, Patkai Christian College and Government Polytechnic college, Seithekema 'C', aser Government Higher Secondary School Purana Bazar, Government High School Thahekhu Government High School Lingrijan, Government High school Burma Camp, Government Higher Secondary School Medziphema aser Government Higher Secondary School Diphupar nunger nung

awareness campaign ayongzüka agia liasü.

Iba campaign nungsa HIV, TB aser Blood donation onük nung ajemdaker school aser college balala atema tetoktepba ayongzüka agiogo. School jenjang nung paint your thought (Face painting/ Mask painting) aser voice your thought (Spoken word competition) tetoktepba aser college jenjang nung publicize your thought (Poster making) aser film your thought (short video/ documentary) tetoktepba agia liasü. Iba campaign ajanga ajak senteper lanur 545 aser tinlonglong 567 nem HIV, TB aser Blood donation dak sendakba nung tangazükba agütsüogo.

Tetoktepba tem ya Dy. CMO, aser DPO, DAPCU Dimapur nungeri tendanga liasü. Committee-i tetoktepba tem asadanga sülen December 10 nü takokertem osang sangdongogo. Iba sentong nung CMO & EAC (Development), Dimapur alakteta jaoker liasü aser pai takokertem nem tetushi agüja liasü.

4buba quarterly National Lok Adalat sitting Dec 11 nü agitsü

Kohima, Luchii/December 10 (TYO): National Legal Services Authority (NALSA) tawabangba kübok Nagaland State Legal Services Authority (NSLSA)-i ayongzüka, district ajak nung 4rd Quarterly National Lok Adalat (People's Courts) sitting December 11 nü agitsü. Iba ya 2021-2022 atema 4buba Quarterly National Lok Adalat asütsü.

District Legal Services Authority (DLSAs)-i District Court tem nung Lok Adalat Benches 11 amenoktsü.

Lok Adalat ya ken o

bentetsü atema tanga lenmang ka, kong okadak ken o bangdaka aliba mesera pre-litigation stage nung aliba ken o tem tangatettep nung takaratiba nung bentetsür.

NLA ya quarterly agir aser iba ajanga state nung aliba nüburtem nem angati agi ken o bentetsü atema maongka agütsür.

Okadak Civil, matrimonial, MACT aser ken o tilateri bangadaka alirtemi iba anogo ken o benoktetsü mesera iba anogo matongdang mangatettep alibatem DLSA front offices, District Court building aser

NSLSA member Secretary Office, DC Office Compound nung benoktetsü mesera iba phone number 0370-2290153 nung tongteprateptetsü mesera nslsa.nagaland@gov.in dangi email sütetsü.

DLSA indang disposal Data ajak State Authority indang web portal nslsa.nagalandgov.in nung upload sütsüsü.

September 11 nü 3rd Quarterly National Lok Adalat agiba mapang ken o 1113 nungi 576 bentetogo aser ken o 576 settlement amount sen 4,86,00,875 liasü.

NCSU inti senden December 16 nü agitsü

Dimapur, Luchii/December 10 (TYO): Nagaland Contractor & Suppliers Union (NCSU)-i sangdong ka ajanga, Advent Christmas aser Best traffic award sentong December 15 nü 4:00 ako nungi

lateter aliba metetdaksüogo. Anungji züngsemtem ajak iba senden nung jangrabangra arua shilem agitsü, NCSU General Secretary John Kath-i sangdong ka ajanga metetdaksü.

Maneni NCSU inti senden December 16 nü 10:00 ako nungi tenzükba Union indang conference hall nung agitsü

Transport dept-i retro-reflective tape amshiyim metetdaksü

Dimapur, Luchii/December 10 (TYO): Ministry of Road Transport and Highways Transport Department-i sangdong ka ajanga, Central Motor Vehicles Rules, 1989

kübok rule 126 nung shia aliba ama AIS-090 dak ajemdaker testing agencies mashikati retro-reflective tape ya agizüker lira gari kiburtemi vendor mashi kati oa retro-reflective tape menaloktetsü ta metetdaksüogo.

Finance Department-i temelenshi kar metetdaksü

Dimapur, Luchii/December 10 (TYO): Finance Department (Revenue Branch)-i sangdong ka ajanga, Nagaland Goods and Services Tax Act, 2017 (4 of 2017) kübok section 9 nung subsection (1) aser section 15 nung subsection (5) nung tashi agüja aliba aser Council tetuyuba dak ajemdaker 2017 küm June 30 nü sangdongba Government of Nagaland, Finance Department,

Revenue Branch, F.NO.FIN/REV-3/GST/1/08(Pt-1) nung temelenshi kar metetdaksüogo.

Temelenshitem:

(a) Schedule II nung - 6%, S. No.243, aser iba dak sendakba entries tem agintsü
(b) Schedule III nung - 9%, S. No. 452P, column (3), nung "in respect of Information Technology software" along ya agintsü.

Mokokchung BJP tir-i Orphanage nung takdang ka sütsü



Mokokchung, Luchii/December 10 (TYO): Mokokchung BJP tir Imolemba Jamir-i, Care and Support Children Home (Orphanage), Tsumarshiyong nung 'Sick room' mesera 'medical room' ama amshitsü atema takdang ya sütsüogo. Iba takdang ya December 10 nü süzükja liasü, ta BJP Mokokchung district, media cell sangdong ka ajanga metetdaksü.

Iba takdang yanglutsü atema senotsü ajak Imolemba Jamir-i agütsü aser maparen ajak BJP Mokokchung district-i achaayanga liasü. Iba takdang ya anogo ka nung süzük aser maparentem ajak BJP Mokokchung district-i achaayanga liasü.

Orphanage achaayangba telok Care and Support Society indang Managing Director

Imchawati Kichu-i, iba takdang sütsüba atema Imolemba Jamir aser BJP Mokokchung district dang kanga pelaba lemsatepba den tang mezüngbuba kija mesera lokti kati orphanage atema ki ka sütsüogo, ta ashi.

Paisa, 'sick room' ta nungja agütsür tanurtem temang manemba mapang anepalutsü atema iba ki ya kanga nungdaka liasü, ta ashi. Pai ashiba agi, talisa tang wara pokteter aliba mapang iba takdang ya kanga nungdaka liasü aser Imolemba Jamir-i teyari tulu agütsüba ajanga orphanage nem teyari tulu agütsüsü.

Temetetsükaji Care and Support Children Home ya 2013 küm amenok aser 2016 küm nungi inyaksangshi tenzükba liasü. Tang iba orphanage nung tanur 14 anepaludar.

Commissioner of Police-i metetdaksür

Dimapur, Luchii/December 10 (TYO): Explosive Rule, 2008 kübok Rule 84 aser Chief Controller of Explosive tetuyuba dak ajemdaker, khen atema fireworks license Commissioner of Police, Dimapur indang office nung agütsüsü, ta Dy. Commissioner of Police (Crime) cum Public Relation

Officer, Dimapur-i sangdong ka ajanga metetdaksüogo.

Anungji fire crackers alizüka ayoktsü jangrartem dang Form AE-5 kanga junga fill up ser permit/license agizüktsü (Form LE-5) metetdaksüogo. Form tem ya Commissioner of Police, Dimapur office nungi agizüktsüsü.

MULUNG NEN O



Wb. I. Yangpir Longkümer
07.07.1941 - 06.12.2021

- Temeim Kinungtsü, chirnur, semchirtem aser kinungertem.

Wb. Yangpir Longkümer,
December 06, 2021 nü pa teti alitsüba kidangi ogo.

Tenem nung aliba yimti ka ama, paji onok atema teimla sayur aser nübor lenir ka liasü. Bendanga agütsüba tesayur, temeim aliba kinungbo aser tebu ka aser ajak dang kanga meimba obou tajung ka. Paji meraketa litetba akhüm taket tetushi nisung ka liasü.

Pai pa taküm piyong asen nübortem tenzükba nung teindang aser tangatetba shisatsü tulu agi tanen maka temeim aser taremzük lia bendanga agüja tenzükogo. Pai toktsüba taküm kuliji onok asoshi tarutsü putu ajak nung leniba senmang asütsü.

Tanü yangi onok dang meima yaritepertem onoki shinga tenüngteta meshitetaka, onok timtem aser mangyim jashi mapang kija kibong, lokti tentet, arogo aser yimten nungi nisung aikati nübo, rongsen, sarasadem aser tesünep o tajung agi onok mulung süneja yaritepba asoshi nenok ajak den onoki kanga pelaba lemsateper.

Tulusang Tsüngremi nenok ajak moajangma.



Hokolbarnü Guwahati nung aliba Swahid Udyan nung Swahid Divas sentong agidang nisungtemi Assam Agitation nung taküm bendanga agütsür nem tetushi agütsüba angur. (Guwahati, December 10)

NE nung ali hectare lakh 2 nung rubber alu ayimtsü: Piyush Goyal

Agartala, December 10, 2021 (Agencies): Centre-i May 20, 2021 nü Rs 12 crore enoktsüogo.

Northeast nung küm 5 tsüngda ali hectare lakh 2 nung rubber atemtsü sentong lir ta Union Minister Piyush Goyal-i ashi.

Northeast ya rubber adokdak tongti ka akümtsü ta Union Minister for Commerce & Industry, Textiles, Consumer Affairs and Food & Public Distribution-i ashi.

Brihostibarnü video conference ajanga 'Destination Tripura - Investment Summit' nung adendang Minister Goyal-i "India nung rubber teimba adokba state tanabubaji Tripura lir aser 30,000 hectares nung rubber lu lir" ta ashi.

State sorkari rubber plantations teimba akümtsü atema mapa inyaksü ayongzükera, ta Union Minister-isa shisem.

Automotive Tyre Manufacturers Association (ATMA) ta ser tyre yangluba company tulu pezüi Northeast India kübok state tenet nung küm pungu tsüngda ali 200,000 hectares nung Rs.1,000 crores endoka rubber lu ayimtsü sentong renemogo.

Iba atema March 1, 2021 nü Rubber Board aser ATMA tsüngda Memorandum of Understanding (MoU) ka nung sign süogo.

Rubber Board-i tentetba ATMA nung tyre company temi

Northeast region nung ano tanga tongtipang rongsen kaji aou lir. Tripura ya bamboo flooring unit tulutiba lir, ta Union Minister Goyal-isa metetdaksü.

"Tripura ya linük nung Agarbatti Industry tongtiba akümtsü lenmang lir aser Aounung India Aatmanirbhar akümtsü akok, iba dang Green Gold, Industry ta-a ajar" ta paisa ashi.

Prime Minister Narendra Modi-i 'Transforming North-East into (Ashth Lakhsmi) of India' ayimoktsüogo aser pai 'Focus Northeast' programme tenzük aser Northeast nung 'Make in India' programme ji 'Make in North-East' programme ama inyaker, ta paisa metetdaksü.

"Northeast nung infrastructure aser industry ajungkettsü atema Northeast Desk of Invest India ta ser tenteta lir" ta Goyal-isa shisem.

Rs.972 crore endoka Agartala - Akhaura (Bangladesh) rail project ajanga exports maparen tuluba inyaktettsü, ta Goyal-isa metetdaksü.

"NE region nung Agartala airport ya mazüngtiba airport tanabuba kümogo aser iba ya

Northeast atema kishi ka akümtsü" ta paisa shisem.

Welcome to My Handloom My Pride

STATE HANDLOOM EXPO

w.e.f. 7th TO 20th DECEMBER 2021
At URBAN HAAT, DIMAPUR, NAGALAND.
TIME : 10 AM to 5PM

ORGANISED BY:
NAGALAND HANDLOOM & HANDICRAFTS DEVELOPMENT CORPORATION LTD.
DIMAPUR, NAGALAND.

SPONSORED BY:
Office of The DEVELOPMENT COMMISSIONER (HANDLOOMS).
MINISTRY OF TEXTILES., GOVT. OF INDIA, NEW DELHI.

15 YEARS OF CELEBRATING THE MAHATMA

Manipur kaketshirtemi Nagaland nung nisung tepsetba atema lungkak ait

Imphal, December 10, 2021

(Agencies): December 4 nü Nagaland kübok Mon district nung sepaitemi civilian 14 khasetba anema All Manipur Students' Union (AMSU)-i Hokolbarnü Imphal nung rally ka ayongzüka agi.

North East Students Organisation (NESO) ketdangsuba kübok iba sentong ayonga agi.

Lungkak aitertemi Northeast nungi Armed Forces (Special Powers) Act (AFSPA) agientsü takhangba agütsü.

Tanü parnoki 'Repeal AFSPA from Manipur', 'Stop killing innocent civilians, 'We stand against AFSPA 1958', 'Give peace a chance' tezülubatem amer lungkak ait.

"Northeast nung AFSPA agientsüla. Iba Act kübok sepaitemi tashiyim mapa inyakdang tai maketba nisung aika taküm samaogo" ta AMSU general secretary Vikramjit Thongam-i ashi.

Iba Act ya magienra tarutsü anogotem nunga kasa lendong ataloktsü, ta pai ashi.

Nagaland kübok Mon district nung atalokba ama Manipur nunga atalokogo. Supreme Court-i CBI dang AFSPA dak sendakba ken o tem bushisüngdangtsü tetuyuba agütsüogo.

Ajisüaka, sepaitem anema ken o kecha mebenok aser sepaitemi maneni Act kübok nübortem reshikangshir, ta Vikramjit Thongam-isa metetdaksü.



Brihostibarnü Guwahati nung All Assam Students Union (AASU) aser North East Student Union (NESO) züngsemtemi AFSPA anema mener lungkak aitba angur.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

LUCHII 11, 2021

Meimchir temeten anogo

Alima ajak nung yashia United Nations-i anir 'Meimchir Temeten Anogo' mongogo. 1948 kum December 10 nu United Nations sabang nung alima ajaklen meimchir shia nem temeten agütsütsü asoshi ken o takang kar renem aser iba dangji Universal Declaration of Human Rights ta aja. Iba anogo nung jagi tenzüka kum shia UN-i iba kasa anogo ya alima nung meimchir temeten anogo kümer, alima ajaklen pei pei yimteni anir amonger. UN-i meimchir temeten asoshi renemba sangdong (UDHR) nung ya arla (article) ajaklir 30 lir aser arla 30 rongnung tetenzükba aser tamendakba arla nung " nisung ajak ya kasasa talenba kecha melii meraket aser temeten keter aso," ta shia lir. Tetezü nisung ajak alima yimten aser lokti nung temeten kasasa lir. Aji oda, takum 2021 kum iba anogomong asoshi shimtetba omena kasa iba arla nung ajemdaker, " Lirumemedemi aliba ajemdaksütsü aser meimchir temeten tajungba odaksütsü,"ta asüba tangatetba nung khuret bona mongogo. Atangji, alima nung shingaia shinga alentsü makok aser shingaia shinga ajemoka yutsütsü makok, kechiyong tasodang shinga tuluba aser tilaba ta maso, ajak sademsadema meraketa alitsüsa Tsüngremi tetsübok ajanga alimai yokbatem lir. Aji oda, kasa UN ajanga alima meimchir temeten ken o renemba sangdong nung nisung ka takum alitsü temeten agüja lir. Tetezü, nisung kati nisung takum ka samatsütsü makok. Kodang iba UN sabang ajanga alima meimchir temeten indang sangdongba nung nisung ka takum alitsü temeten indang jangjatsüba ya bilemdangdir, nisung kati nisung ka takum samatsütsü Universal Declaration of Human Rights arla asem anema inyakba mapa lir. Nisung ka asoshi takum ya ka dang, anungji takum kaji samarbo ojang. Iba takum yabo nisungi yangluba masü saka Tsüngremi yangluba takum lir, anungji nisung takum madak kiburji India sepaitema masü mesüra Naga nung sepaitemia masü, shinga masü saka teyanglusang Tsüngremji kibur lir. Iba tangatetba nung nisungi nisung tepsetbaji UN sabang ajanga aitsür. Ibaji dang masü saka nisung kar ochimashi aser morumoruba ajanga nisung kar timtemdaksüra mesüra loktiliba nung lirumedema melitetsüsa sensaker mesüra alar kümdaksüra, iba mapaji UN sabang nungi sangdongba meimchir temeten anema asütsü. Tanü alima nung nisung kar kanga takar saka karbo kanga sensaker, karbo chirmechima endoker saka karbo tebok tazung yipteni aier ta nisung o nisung na tsungda lirumemedemtsüsa nisungtemi inyaker. Iba amaji mesü alima nung nisung ajak ya tasodangyongi kasa temeten keter aso ta tangatetba lia nisungi nisung mezüngmeshi mesü kasasa lirumedema alitsü merangtsü asoshi UN sabang ajanga ajungshir. Aji oda, karbo alima nung kaketreju tajungtiba nung azünger saka karbo kaketshidaki moutet ser tangazütsü ka mangazükba agi pi memenep timtema alitsüsa akümer. Ibaji dang masü saka kasa nisungsa süaka karbo lir melima kiojen lir saka karbo mejangdaka maka, kima yimdong nung mejanga akümüli atemer. Iba ama kasa meimchir rongnung libaliru nung tetsungda aliba jagi, nisungbo kasasa nisung ser nung karbo nisung memesük shururu jenjang nung alir. UN sabang ajanga iba ama meimchir libaliru nung lirumemedem, ka onsara aka aser kabo kecha maka ta mesü lirumemedemaksütsü asoshi meranger. Atangji, iba UN terenembatem mapa kuma inyaksü asoshi nangzükteper alima kintem rongnung India-a dena lir, anungji India nung nisung shinga pei takum sama tsübuseta mesenzütsü, nisung shinga pi lar makümtsü, nisung shingaia shinga mezüngmeshia mamshitsü, nisung shingaia tangar akoksatsüsa meinyaksüsa temeten agüja lir. Tia majung, tanübo India nung nüboritem takum kümzüksü asoshi ayuba sepaitemiang anir tai maketba nüboritem takum samatsür, reshikangshir aser maksütsür. Aji oda, nüboritem pei inyaksü meinyakdaksü, pei amangnüsü mamangdaksü ase pei onüleni moudaksü talenba kübok ayuba mapatema aiben ataloker. Iba jagi India mainer aser asenok India kübok alirtema teti tetsübu aser tarendak nung aliba agi nisungbo nisung ser nung tasodang keter asoba temeten mamshitetter aser meraketa melitetter. Iba ama talenba nungi kari arua salatsütsü masü saka asenoksasa salatsü nungdaker. Aji oda, asenok tangar kübok tsübuseta aliba alar ama tia nungi salatetsü atema asenoki asen temeten metettsü tim. Iba temetenji UN ajanga asenok nem agüja lir. Ibaji metettsü atema asenoki UN Universal Human Rights Declaration nung kechi shia lir aser asen linük temzüngia asenok nem kechi temeten agütsür, itemji bushia metettsü aser angatettsü merangra, iba jagi asen nüchi kümdaksütsü aser asen takum nung temeten aser teinyaksü indang angatettsü.

OLEMSABANG

ABAM 150 Jubilee Mung Sülen Teinyaksü Nükla

Matsüng Longkumer

Okila

AD1872 ya Naga nung, talisa Aor, yimsoshiba nung kanga tongtipang kum ka lir. Iba kum America nung Missionary Dr. Edward W. Clark ajanga Naga limaYisu yimsü mezüng amenlok. Yisu yimsü arur kum 150 ajungba benjongmung 2022 nung amungtsü ABAM kübok aliba Arogotem yongyaseta ataba aser renemtepba mapang ka lir.

Nisung yimya agi lokti mesüra nija jenjang ka alangteter külen iba sülen kechi inyaksü ta tasüngdangba arur. Yanglushidi Sensaksem Sabang (YSS) nung tongpurtemi iba tangatetba ya ABAM 150+ nung rangloker bener arua anogo asem tashi sensaksema aruogo. Onüki aginüba ya liasü, Jubilee-ji Tsüngrem taoshi asoshi tenüngsang agütsüba kum, taoba mapatem meyipa repringshiba, mabensai inyakbatem repringshiba, tai nangzükba aser tatok agütsüba, temiem sayuba kum. Ano Jubilee sülen kobala tenyaba mapa tasen inyaksü ta Tsüngrem dang mangdang tasen meshiba kum. Anungji 150 Jubilee sülen koba mangdang nung ABAM aser Ao arogotem aotsü? aser inyaksü?

Iba dak ajemdaker shisa lemsatepba Aor yinti teshisadangba lenitsü aser bilemdangtsü asoshi tatsü agi iba ocet lemsar.

ABAM 150+ aser Rangben AnepaluTenzükba (Holistic Ministry)

Ao Arogotem Khrista yimsü agizüker kum 150+ sülenbo ministry ya khen meyipa repringtsü kanga nungdaker ta lemsatepogo. Tang teinyakdak mapa ya majung ta masü saka alima densa mongpu den apert repringshia amangbapur sümedema indaksütsü asoshi jenjang tekaba nung mapa inyaksüla. Ministry ya nisung, lokti aser alima rangpen amsemba (Holistic) nükrangdong yur inyaksüla. Tanela kümzüksüji Arogo ka asoshi tongtipang. Iba tanela kümzüksü asoshi nisung aser lokti rangpen arakzüdaksüba shilemtem mesendoki anepalutsü nungdaker. Yangi shisaliokdak (schools, universities), manemer anelapudak (hospitals), nübur asoshi ayangdak (employment), alima tzümpung wazüka ayuba nung shilem agiba, aluyimertem nungitba mesüra sobaliba tajungtem, amungtsümong tajungtem wazüka ayuba nung rangloksüla. Item ya kata mesüdoki liromedema indaksütsüla. Khristan telok balala den amalitepa tenyaba mapa inyaksü leman sadema lapoktsüla. Mokokminertem sadoka külemtetsü sa policy yanglutsüla, alirongsen nung sensaker, shi nung shiranger, shisatsü nung tangar memenep, LGBTQI+ amala shirnok jendoka lir parnok Khrista dangi anir aruba aser takum jenjang ajungketba tenyaba mapa asentenshitsu. Teti beshiba yimya nung jangaratema alidang densa den apert melenshitsu amadokra asen lokti tejakleni maor ta metetdi.

ABAM 150+ aser Lim Arogo inyakyim

ABAM ya Ao Arogotem tebuti/tetsüdi ama shisangshisanga alitsü kanga tongtipang. Iba ya ataloktsü asoshi Mungdang nung inyakeritem anir Arogo aser tamanger ajaki ABAM ya pa tata akhüm aser sentsüji wazüka yutsütsüla.

Baptist tamangba nung lim arogoji jurila yimden (autonomous) ta meteta kar. Saka Mungdang ka küpok alitsü aidangji iba jurila yimden inyakyim ya koba tashi amshitettsü mesüra atsü-anem katettsü? Joko ABAM 150+ nungbo ABAM Centralise asütsü nungdaker ta ajitetter kechiba süra mapa tuluba aser teimba adoker aser ajak arok makum tashi tebilemba mataloktetsü. ABAM, Arogotem aser Aor tamanger liromedema yinnüra ABAM inyakyim ya mapa kar nungbo lokteper aotsüla.

Tang aliba ministry telemsa ya gender mesüra kümsük (age group) dak rangloker yangluba amai lir, tat.agi, women, youth, child, a.a. 150+ nungbo item ministry den repsema tensa den apert yamai yanglushi nung koda? Tat.agi mission and spirituality, public witness & justice, women and youth empowerment, Khristan literature, loktiliba aser rongsen-ketzung mission amala. Iba ya ajanga wadangi sadema inyaktetsü aser tetsür tebur mashishi inyaktetsü lemanga adoktsü.

ABAM 150+ sülenbo ajak tentetba aser ajak inyaktetba (inclusive) Mungdang ta sangdongtsüla. Tat.agi, lim arogotem nung tenzüker talisa Sannüker tetsür 50% tashibo anioksüpangzüngtsüla (tanü tashi Arogotem nung tetsür Sannüker inyakba aikabo mali). Mokokminer temsüa alirtem Mungdang nung mapa agütsütsü pangzüngtsüla aser mapa kuma inyaka sayutsüla. Khrista nung asenok ajak kasa ta sayuba ama tetsür aser tebur, mokokminer ajak Khrista Arogo nung mashishi tenzütsü mapang tongogo.

ABAM 150+ aser Tenyaba mapa

Arogo (ABAM) ya Tenyaba Mapa ajanga aser Tenyaba Mapa inyaksü asoshi alir. Iba Tenyaba ya nisung nungi masü saka Tsüngremi Tenyaba Mapa lir (Mathi 28:19).

Local Arogotem sasep nung jurila mission mapa balala inyaka aoba ya Mungdang kübok lokteper ka kuma inyak nung ajungtsü südi ta tenzüker Zulu Jamir-ishia liasü. Hau, Baptist tamangba nung autonomy ya tongtipang nükmän ka lir saka tajung ka asoshibo atsü-anem lia mapang aser tensa den apert melenshiyonga aotsü menungngtsüla. Arogo ajaki pei jurila inyakba ya junger aser takok ngudar saka item alirongsen, nübu aser wadang lokteper nungbo ano kanga sadema mapa tuluba telungjunga jeta bener aotsü.

a. Ateptsüng/lim Tenyaba Mapa

Litsü atena/Bendangli Tenyaba Mapa ya kanga junga bener odar. Arogo aser Mungdang asoshi aji tongtipang. Saka sensaksemba mapang nung ateptsüng/lim dangi meyipa tenyaba mapa inyaksü(Back to Home Mission) nungdaker ta aikati lemsatep. Arogo ta kodang südir, tulu tila ajak nung inyakyim (structure) kasa. Saka lim Arogo aika nung rongsen agi tsükdakba yong mapa abensa meinyakteter. Iba ya ABAM asoshi tebilemetsü tulutiba ta agizüksüla. Pei chir nungdakba, tanela aser shi,peria magütsü yur dangar yaribaji tai (temenen) masü na? Dangar meyaritsüla ta ashir masü saka anemsü jakla lira ibajibo melenshitsu tajungba.

ABAM kübok Arogotem liromedema aintsü asoshi Ao Arogotem nung tenzüker ajak kasa jenjang nung amshitsüla. Sannüker nem ita sen Rs.10000/- magütsüter Arogotem ABAMi yaritsütelemetba tajungmapa kuma inyaka aruba ya pilot project ser yamala mapa ano inyaka ABAM kübok Arogotem sümedema yangertsü nükla ayutsü junger. Ya inyaksü tasak saka tamakoktsü mapa masü ta tangatetba nung ajaki temulung agütsütsüla.

b. Litsü atena/Bendang Tenyaba mapa

Litsü atena/Bendang tenyaba mapa ya kanga takok ngua aodar. Bendang (international) mission telok balala den amalitepa inyakba dang masü saka asen tsüraburi kümteta doktsüba mungdangtem den ano khen asentenshia parnok den mission inyaksü junger. Iba ya ajanga leman aisü nung parnok ajungketba dang masü asen Ao Arogotematemaotsü asütsü.

c. Arogo aser Lanurtem tebilemetsü

Arogo zünba putu ka nung asenok alir. Arogotem aika lanur dak rangloker parnoki aginüba yimya nung külemba ajanga traditional arogotem nungi lanur jendi loa odakagi. Tarutsü Arogoji lanur Arogo süra iba ya tebilemetsü tulu lir. Iba indang jembidang Tiatoshi Longkümeri lanur ministry ya 'ABAM temulungjang ministry asütsüla' aser parnok asoshi sendong asameyangtsüla ta shia liasü. Arogoi mapang talanga lanurtem tenyaba mapa nung senzüka yutsüba kuli aika jembu. Arogo nungeri Youth Pastortem 'time pass' pastor amai bilemba mesüra youth ministry ya appendix ka amai yutsüba a.a. Iba tebilemetsü alidang Youth pastor karbo tanela tejangraba/tangatetba masü shi tejangraba agi kokdaksür lanur sentep nung südoksünem tali saka Tsüngrem O peria magütsüba lir. Member care ministry nung temulung agütsütsü nungdaker. Item ya reparanga lanur ministry ya khen restructure sür bener aotsü 150+ nungji tongti nükmän asütsü nungdaker ta ajaki lemsatep.

Tanela agi mesüba den külemi Youth Ministry ya lanurtem sempet rangben amshitettsüsa asameyang yanglutsü nungdaker. Item lanur rangben molutsü asoshi Impur nung mesüra tesem tajung ka nung skill/entrepreneur development centre lapoka Khristan sobaliba (spiritual, moral and ethical) nung amendaker training agütsütsü nungdaker. Iba yagi asen lima Khrista miemer jendi adoktsü aser lokti mapa nung sübokrem, ochimashinokdangtetsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ICC-i US Senator, James Lankford nem award ka agütsü



International Christian Concern Tir, Jeff King (ajichilen)-i US. Senator, James Lankford nem 'ICC Hero on the Hill Award' agütsü dang tangokba noksa nung angur. Senator James-i religious freedom pusema inyakba atema ICC-i pa nem iba sempet agütsüogo. Kasa noksa nung ICC Director of Advocacy, Mattias Perttula-a angur.

United States, December 10 (Agencies): U.S. Senator, James Lankford (R-OK)-i alima nung religious freedom ajungkettsütsü atema inyakba atema tawa International Christian Concern (ICC)-i pa nem 'Hero on the Hill Award' agütsü.

ICC Tir, Jeff King-i Senator James Lankford nem iba award agütsü. US senator rongnungi iba sempet mezüing

angusangji pa asütsü. ICC-i alima tesem balala nung reshikangshi tia nung aliba Khristantem atema inyaker aser US sorkar nem mapang shia Khristanatem reshikangshiba dak sendakba osang metetdakja arur.

Yamaji US Senator Lankford-i pa tashi amshia US sorkar dang alima nung religious freedoms anema inyakba lenirtem anema inyaksü ajungshia arur.

Senator Lankford ama lenirtem ajanga ICC indang mission nung yarisemer.

Jeff King-i, "Congress nung Senator Lankford nung ama aliba atema ICC-i pelar. Reshikangshi tia nung aliba Khristantem yaritsü atema senator-i janrar aser Congress lenir ka ama pai alima tesem balala nung religious freedom ajungkettsütsü atema inyaker. Pa ama Congress nung ano züingsem aika adoktsü onoki imlar," ta metetdaksü.

Religious freedom ya fundamental temeden ka asütsü atema ozüing yanglutsü asoshi Senator, Lankford-i benoka liasü aser Iran aser China nati minority tem anema inyakba atema bill ka agizüktsü benoka liasü.

Taküm International Religious Freedom Summit nunga pa mendenbuba liasü. Iba summit nung tamangba yimsü balala nungi lenirtemi alima nung reshikangshiba tebilemsü anema inyaksü asoshi o lemtepogo.

Lankford-isa alima nung tsüingrem mezüingmeshiba ozüingtem agientsü atema bangzüing ka benoka liasü aser iba bangzüingji yaküm agizükogogo.

Karnataka nung Arogotemi Khristmas sentong magitsüsa akümer

Washington, D.C, December 10 (Agencies): Karnataka nung Hindu yimsü alia amangertemi Khristantem amakba kanga bulua atalokba aser Khristantem amokmerenba sülen state nung Arogo aser House churches aikati Khristmas sentong thinentsüsa kümogo, ta International Christian Concern (ICC)-i metetdaksü.

Talisa Karnataka kübok Belagavi District nung Khristantem atema tensa kanga mejungi kümogo, ibayongji Khristantemi Amongnü tekülem sentong agiba anenogo aser Arogotem mapa anenba den külemi Khristmas sentonga thinenogo.

ICC den jembidang Gokak nung aliba Arogo ka nung pastor, Yellappa-i, "Onoki kodamasüba tensa ka ajuruogo. Ki kiburi tangsa ki toktsür aienshiang ta metetdaksü, aser ibaji Hindu yimsü alia amangertemi ki kibur rongshiba agi lir," ta metetdaksü.

Hindu yimsü alia amangertemi ki kiburji aiben amokmerena aruba sülen Pastor Yellappa-i par kidang lokti tekülem sentong agiba anentsüsa aküm.

"Iba building nungji tesüiba küm 9 tashi ni ayongzüka Khristantem lokti tekülem

sentong agia aruogo. Taoba mapangtem nung ni anema aiben inyaka aruogo aser asemben tashi puogo, ajisüaka tang amai Tenla ki shibangtsüsabo tensa majuru. Ni dang masü saka tanga Arogotemia Tenla ki shibangtsüsa kümogo. Tarutsü tiaji ni memetet, Tsüingremi dang onok yaritetsü," ta paisa metetdaksü.

Karnataka nung state sorkari anti-conversion ozüing ka benoktsü telemetba agiba sülen Hindu yimsü alia amangertem tasü itshir Khristantem anema inyaker.

ICC den jembidang Karnataka nung Arogo lenir kati, "House churches aikati Khristmas sentong magitsü lemtetogo. Iba district nung house churches 300 jungnüa lir, aser iba nungjagi tesadang shibo shibangogo. Khristmas atongdangbo ano tensa tamajungba akümtsüa akok. Onoki sarasadem nüngdaker," ta metetdaksü.

Kandala nung Pentecost Arogo ka nung pastor, Andani-i, "Tesüiba Amongnü ana nung ozü Arogo nung züingsem 200 nungi 50 shi dang Tenla kidangi aru. Taruba Amongnüa kwi arutsüar ni memetet. Yimtsüing asem nung RSS teloki ozü Arogo züingsemtem dang Tenla

kidangi maotsü tuyua amokmerena liasü," ta metetdaksü.

Hombar (December) nungi Karnataka Legislative Assembly senden tenzüktsü aser iba senden nung BJP-i aniba sorkari anti-conversion ozüing agizüktsüa akok.

Karnataka nung anti-conversion ozüing ka benoktsü aliba anema October ita nung Khristantemi Hubballi nung adenshir longkak aita liasü. Pastor tem leniba nung Khristan noklang aika adenshia Hubballi nung Khristantem anema inyakba aitsüba den külemi state nung anti-conversion ozüing mebenoktsü atema parnoki takhangba agütsü.

State sorkarisa ozüing alema lapokba Arogotem survey agitsü lemtetba atema Khristan lenirtemi aitsü. Longkak aitiba sentong nungji Secretary of the Alliance Praveen Nadakattin, HDMC councillors Doreraj Manikuntla, Suvarna Kalkuntla, taoba mapang councillor Sudha Manikuntla aser Congress lenir Anilkumar Patil nungeria shilem agia liasü.

K h r i s t a n t e m i s a Khristantem anema inyaker aibelenertem aputsü atema takhangba agütsü.

ANOGO ABEN TSÜNGREM DEN

Yisu Bushiba

MK. 1:36

Asenok ajaki Simon Peter junga meteta lir kechiaser tamachi aser osangtajung ajunga nung pai jepdak jembi (Matt 16:22; 17:4;26:33).

Saka Peteri teti Yisu bushia liasü. Peteri Yisu kangki nung angenlokba aonung Yisu sülen talang nungi anidak (Matt. 26:58). Peteri kadang Yisu shia aruba anagashi leperi asem (Luke 24:12). Yisu tonga aotsü asoshi Peteri tzüim nung jaja (Yn 21:7) aser Yisu den atentsü asoshi tzüma nung jaja (Matt 14: 29). Peter teti shidak mejembi mesüra shidak meinyak, saka pai teti Yisu den alitsü bushi.

Ibayongji, pai teti pa Kibur den ajurutep aser mulung lemtet nütsüing küma ain. Kodang Peter Yisu dangi aru tangaria pa anidak. Peteri kechi bushia liasü tangaria aji bushi. Nai kechi metet ibaji ajanga tangari na tajungtiba metet asü? Nai Yisu bushir ta tangari na metet asü? Tsüingrem tenangzüka: "Aser nenoki ni bushitsü aser ni angutsü, kadang nenoki temulung ajak agi bushidir" (Yn 29: 13).

Ni tatishitsü anidakba agi tangar Yisu anasa indaktsür asü? Ne mulungjang Yisu bushitsü merangra, nai teti Pa angutsü. "Aser Tanela aser tanioklai, Arung, ta ashir. Aser shibai angashir Pai arung ta shiang".

Tekülem aser tetushi kentener telok "Linok Emer" tentetogo



Mokokchung, Luchii/ December 10 (TYO): December 3, 2021 nü Longchem Baptist Arogo nung "Linok Emer" ta ser tetushi aser tekülem kentener telok ka tenteta meshitetba aser temoatsü meshiba sentong ka ayongzüka agiogo.

Linok Emer telok ya Japukong lanuri tenzükba lokti ka lir.

Tsüingrem sentsüwangshi atema aser Pa tenüing atemer asen Ao Arogotem aser Arogo nung sendakba sentong ajak nung Ao ken ajanga shilem agitsü nükjidong nung iba telok tentet.

Iba telok ajanga asen Aoer oshi amshiren tashi itshitsu.

Lanur aika pei tetsü oshi mejembitetba den külemi tetsü oshi nung ken metentetba timtem ajangshir, anungji iba tetushi aser tekülem telok ajanga iba tsütsü teyarir ka asütsü; lanurtemi pei oshi nung ken atentsü aser jembitsü ajungmesotsü, ta teyimla nung iba telok tentetogo, ta parnoki metetdaksü.

Metetpelatsü atema tenüing aser contact numbers yamai agütsür: 1). Nokchunger Longchar Ph. No. 9615390490 & 2). Toshi Langu Ph. No. 8837244295.

OLONG PAITEP # 6023

	1			2		3	4
5					6		
7		8					
					9		
	10						
11							12
				13			
				14			
15							
				16			

TIPIEN	LANGTSÜNGLEN
1. Balaka - (5)	2. Hai sür inyak - (4)
6. Aika shirangba - (4)	3. Aor tenüng ka - (6)
7. Tar tatsü - (6)	4. Ali telungi talangka lur - (5)
9. Nenü'er jabaso - (4)	5. Tebang kenyongi mazüoker - (4)
10. Sen latettsüba - (7)	8. Ken atema anenzükertem - (5)
11. Tangar kübok alir - (4)	9. Toktepa noktak - (5)
14. Lon nung inokba - (6)	10. Sen - (6)
15. Tzü ayimdak - (4)	11. Benjong agi - (5)
16. Ajok - (5)	12. Telung nung rizünga ayu - (4)
	13. Tebang nung enok - (4)

OLONG PAITEP # 6022 TELANGZÜBA

TIPIEN :	LANGTSÜNGLEN :
1. Aben, 4. Artsü, 7. Lisem, 8. Liwa,	1. Aruli, 3. Balala, 5. Suwar, 6. Belem,
9. Sarasadem, 12. Aket, 14. Mangu,	9. Süjak, 10. Aonung, 11. Dokan,
15. Anünü, 16. Ango.	13. Tinu.

Noksa nung meputepi aliba 5 bushiang



TANÜBO NAI LANGZÜANG

Q. 'Ciprian Foias Prize' ya koba wadang den sendaktepa lir?
 [A] Space Science [B] Mathematics
 [C] Virology [D] Business
 _____ (Taruba adok nung onoki langzüksü)
YASHI ADOK TELANGZÜBA : Volunteer now for our common future

AO OSHI ANGAZÜKDAK:

TANÜ ANGAZÜKTSÜBA OJANG



Lirep

(v) lia lia mejungi aliba agi sama (cease to exist owing to unethical living)
 * Nübener kibong aika tali mashiba agi lia lia lireper.

Liru

(n) taliba yimya (moral conduct)
 * La jakla liru ajungba agi medemeri kanga meimer.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA

Nagmati (Coal) timtiba adokdak linük kar:

- China
- India
- United States
- Indonesia
- Australia
- Russia
- South Africa
- Kazakhstan
- Germany
- Poland



Chaidar coal mine, China

SUDOKU # 6064

			3		5		9	
	2							
		1		8		4		
7							9	
3			5	7				
	5		9	4		2		
5	4	9				1	3	
		3	2	1				
		6		4				

TELANGZÜBA # 6063

5	3	7	4	9	8	2	6	1
6	1	4	2	3	5	9	7	8
2	9	8	7	1	6	4	5	3
8	5	1	9	2	7	3	4	6
4	2	3	6	5	1	8	9	7
7	6	9	8	4	3	5	1	2
1	4	5	3	6	2	7	8	9
9	7	2	1	8	4	6	3	5
3	8	6	5	7	9	1	2	4

OJANG LUTEP # 5610

NNÜKAAGZBO	:	<input type="text"/>							
YAU	:	<input type="text"/>							
AASK	:	<input type="text"/>							
IJBEMA	:	<input type="text"/>							
AAM	:	<input type="text"/>							
AANGMP	:	<input type="text"/>							
AHITKS	:	<input type="text"/>							
UNGN	:	<input type="text"/>							
NYMEAİK	:	<input type="text"/>							
OTTKSÜ	:	<input type="text"/>							

OJANG LUTEP TELANGZÜBA # 5609

**TAKÜM NUNG TEMELENSHI ADOKTSÜ ASOSHI
 ASEN DANGI SAYATENYA BALAKA MARUTSÜ**

TAN HOPTA ATEMA - KOMA SÜLA ?

Q. Kisüjensü dang agiba osettem aser asen taküm atema nungdakba chiyongtsü aser osettem ajak asenoki asen nisungtem dang nungi dang alitsüsa, ajungshitepa, lanurtem nem item mapatemji tenzükdaksü nunga koma süla ?

Lenirtemi Chief of Defence Staff Gen. Bipin Rawat nem akhüm agütsü



December 10, 2021 nü New Delhi nung Congress Party lenirtem- Rahul Gandhi aser KC Venugopal nati Chief of Defence Staff, asür Gen Bipin Rawat aser pa kinüngtsü, Madhulika Rawat na nem tatembangbuba akhüm agütsüba noksa nung angur. Bodhbarnü Tamil Nadu kübok Coonoor nung IAF chopper ka tsükokba lendong nung Bipin Rawat aser pa kinüngtsü na densema nisung 13 asü.

New Delhi, Luchii/ December 10 (Agencies): Hokolbarnü Union Home Minister, Amit Shah, National Security Advisor, Ajit Doval aser Congress lenir, Rahul Gandhi nung densema lenir aikati Chief of Defence Staff, General Bipin Rawat aser pa kinüngtsü, Madhulika Rawat na tasü mang süngden nung naro tokja akhüm agütsüogo.

Bodhbarnü Tamil Nadu nung IAF chopper ka tsükokba lendong nung tena densema nisung 13 asü aser iba lendong nungi ka dang kümzüka liasü.

General Rawat aser pa kinüngtsü na tasü mang New Delhi nung par kidang yur tatemsabuba tena nem akhüm agütsüba sülen rongdokogo.

General Rawat'er kima loktii 'Bharat Mata Ki Jai', 'Gen Rawat amar rahe' aser

'Uttarakhand ka heera amar rahe' ta yimyim ayima liasü.

Uttarakhand Chief Minister, Pushkar Singh Dhami, BJP lenir Ravi Shankar Prasad aser British Ambassador to India, Alexander Ellis nungeria Gen Rawat aser pa kinüngtsü na nem akhüm agütsü. Taoba mapang Defence Minister A K Antony, DMK lenir, Kanimozhi, Haryana Chief Minister M L Khattar, BJP lenir Baijayant Jay Panda, Delhi LG Anil Baijal, Minister of State Jitendra Singh aser Minister of State for Social Justice & Empowerment Ramdas Athawale nungeria Rawat aser pa kinüngtsü na nem akhüm agütsü.

"Tang ama kanga tongtibang mapang ka nung pa asüba ya linük atema takoksa tulu," ta taoba mapang Defence Minister, Antony-i

ashi.

Rajya Sabha nung Opposition Lenir, Mallikarjun Kharge-i, "Pa ya nisung tajung ka liasü," ta ashi. "Pa asüba ya linük atema takoksa tulu; pa ya linük atema akhümket ka liasü," ta Union Information & Broadcasting Minister, Anurag Thakur-i ashi.

Delhi Chief Minister, Arvind Kejriwal aser Delhi Deputy Chief Minister, Manish Sisodia natia tasü mang süngden nung naro tokja asür nem akhüm agütsü.

Gen Rawat ya tindang aser tasütait lenir ka liasü. Arrshi küm 63, Rawat Army Chief asü dang 2016-19 küm tsü ngda pai arrtsülen nungi kiralongraba aser Jammu & Kashmir nung telungpurtem tebilemstü anema asalentong tajung aika yanglua inyakogo.

Tang tashi nung India nung nisung 25 dak Omicron putetogo

New Delhi, December 10 (Agencies): India linük nung tang tashi nung nisung 25 dak Coronavirus Omicron variant putetogo aser parnok timbaka dak iba tashidak temaitsü tera dak keta lir, ta Hokolbarnü Union health ministry-i metetdaksü.

New Delhi nung osangbenertem den jembidang Union health ministry-i, Omicron varaint putetba nisung 25 rongnungji Rajasthan nungi nisung 9 lir, Gujarat nung asem, Maharashtra nung ter, Karnataka nung ana aser Delhi nung nisung ka densema lir, ta metetdaksü.

"November 24 tashi nung linük ana nung dang Omicron puteta liasü. Tangbo linük 59 nung Omicron putetogo. Item linük 59 nung nisung 2,936 dak Omicron putetogo. Iba dak alia shiranger 78,054 indang genome sequencing agidar," ta Ministry of Health nung Joint Secretary,"

Lav Agarwal-i osangbenertem nem metetdaksü.

Health ministry-isa tanga linüktem nungi arurtem junga mita reprangtsü metetdaksü.

"Bendang linüktem nungi arurtem mita reprangdar aser tendangdar. Iba dak alia health infrastructure upgrade südar. State tem danga tanga linük nungi arurtem dak tenük yoktsü aser tendangtsü metetdaksüogo," ta Agarwal-isa metetdaksü.

"Tekümdangtsü balala shidak benshitsüla. Mera agia meinyakba ajanga Europe nungbo iba tashidak kanga prokogo," ta pai metetdaksü.

Linük nung coronavirus vaccination drive dak sendakba nung health ministry-i, linük nung tain nütsü ng shilem 86.2-i coronavirus vaccine mezü ngbuba dose agiogo aser shilem 53.5-i dose anaprongla agiogo, ta metetdaksü.



December 10, 2021 nü Jammu nung police kati mask magir ka dak coronavirus tendangtsü atema apuba noksa nung angur.

Afghanistan nungi Hindu aser Sikh nung 110 anir aruogo

New Delhi, December 10 (Agencies): Hokolbarnü Afghanistan yimtiba, Kabul nungi Hindu nung aser Sikh nung 110 chartered tayimtsü ka ajanga New Delhi tonga anir aruogo; iba tayimtsü ya India sorkari achaayangja liasü.

Afghanistan nung aliba Gurudwaras nungi Sri Guru Granth Sahib asem aser 5th Century mapang Asamai Mandir, Kabul nungi Ramanaya, Mahabharat aser Bhagavad

Gita asem densema tayimtsü nungji bener aruogo, ta ketdangsertemi metetdaksü.

Sikh nung temeshi kaketji Gurdwara Guru Arjan Dev Ji, Mahavir Nagar-i bener aotsü aser Hindu nung temeshi kakettenji Faridabad nung aliba Asamai Mandir-i bener aotsü.

India World Forum-i, Afghanistan nungertem anir aruba sülen Solti Foundation-i parnok yaritsü, ta jelia metetdakja liasü.

Taküm US sepaitemi Afghanistan toktsür aoba sülen Taliban-i Afghanistan linük agiogo. India-i August ita nungi tenzüka tang tashi nung nisung 565 Afghanistan nungi anir aruogo, ta taoba hopta Lok Sabha nung sorkari metetdakja liasü.

Minister of State, External affairs, V Muraleedharan-i, tang tashi Afghanistan nung aliba India nungertem den MEA-i maneni tongtepratepa arudar, ta metetdaksü.

Police tashiyim ajanga aluyimer ka danga masü: Narendra Singh

New Delhi, December 10 (Agencies): Hokolbarnü Centre sorkari, aluyimertemi küm ka piyong longkak aita arudang police tashiyim ajanga aluyimer ka danga masü, ta metetdaksü.

Rajya Sabha nung tasü ngdangba ka langzü dang Agriculture Minister, Narendra Singh Tomar-i, "Asür aluyimertem kibongtem nem senotsü teyari agütsütsüji state sorkartem teinyaktsü mapa," ta Agriculture Minister-i metetdaksü.

Rajya Sabha nung Congress lenir, Dhiraj Prasad Sahu aser AAP lenir, Sanjay Singh nati senteper asü ngdangba langzü dang minister-i, "Aluyimertemi longkak aitdang police tashiyim ajanga aluyimer shinga masü," ta metetdaksü.

Aluyimertem longkak aitba mapang nung asürtem kibongtem nem Centre sorkari teyari agütsütsü tebilemba ali

asü?, ta tenati minister dang asü ngdanga liasü.

Centre sorkari shidi ka ajanga aluyimertem dang, aluyimertemi akhangba onük ajak agizüktsü, ta nangzü kba sülen aluyimertem unions-i tentetba- SKM-i longkak aitba anentsü telemtetba agiogo. December 10 nü aluyimertemi yakünü helicopter tsükokba lendong nung asür, Chief of Defence Staff, General Bipin Rawat nem akhüm agütsüogo aser December 11 nü parnoki 'Vijay Diwas' amongba sülen kidangi meyipa aotsü.

Yaküm November ita nungi tenzüka Punjab, Haryana aser Uttar Pradesh nungi aluyimertem meyirjang aika Delhi arrtsülen adenshir aluyimba ozü ng asemprong agienang, ta takhangba agüja aruogo. Tesüsa November 29 nü Parliament nung Bill ka agizüka aluyimba dak sendakba ozü ng tasen asemprong agienango.



New Delhi, December 10, 2021: Aluyimertemi longkak aitba anentsü telemtetba agiba sülen Hokolbarnü Ghazipur arrtsü nung United Sikhs telok nung zü ngsema aliba aluyimertemi kidangi meyipa aotsü atema khu renemba noksa nung angur.



Mexico, Chiapas state kubok Tuxtla Gutierrez anasa gari tsükokba sülen yirur aliba migrant tem lenmang tezülen temang anepaluba noksa nung angur. Mexico nung ketdangsertemi ashiba agi, iba lendong nung nisung 49 süogo.

Kumara tepsetba atema Pak-i takaratiba nung temenok agütsütsüla: Colombo

Colombo, Luchii/December 10 (Agencies): Taoba hopta Sialkot nung nisung telok kati tepsetba Priyantha Kumara atema par kinungertem nem financial security aser compensation agütsütsü aliba dak sendakba nung sensak asemtsü atema Sri Lanka foreign minister GL Peiris aser Colombo dangi Pakistan indang acting high commissioner na ajurutepogo.

Priyantha Kumara ya taoba Hokolbarnü Sialkot nung nisung telok kati kanga mejungi azük aser iba sülen lenti-i atsür oa rongdokja liasü. Pa Sialkot nung sports equipment factory ka indang manager liasü. Factory nung inyakertemi pai Prophet Muhammad tenüng ajenoka aliba poster ka mezüngmeshia amshi ta aija pa tepset.

Peiris-i, Pakistan envoy Tanvir Ahmad dang Kumara'er kinunger nem ita shia kecha tetsükdaktsü makai itasen

agütsütsü asoshi inyakyim tapet ka benoktsü mepeshia liasü, ta sorkar sangdong ka ajanga Brehostibarnü metetdaktüsü.

Ahmad-i, minister dang Pakistan sorkari iba ken o bushisüngdangtsü aser asür kinunger nem temenok mapang shidak nung agütsütsü atema tenüngdakba jenjangtem agiogo, ta ashiba den iba tatalokba asoshi tatok meshia liasü, ta kasa sangdong ajanga metetdaktüsü.

Kasa mapang nung Peiris-i, Pakistan aser Sri Lanka na tsüngda mapang talangka tesendaktep tajung aliba indang lemsatepba den asür Priyantha Kumara'er kinungertem nem ochi obendang agütsütsü atema Islamabad-i jenjang tapet agitsü tamang akaba lemsatep.

"Honibarnü Pakistan Foreign Minister Shah Mahmood Qureshi den phone ajanga jembiba mapang Minister-i asükhu lemsatepogo aser ken o

bushisüngdangba osang Sri Lanka nem takok tashi takaratiba nung metetdaktüsü tenangzükba agütsüogo," ta sorkar sandong ajangasa metetdaktüsü.

Sri Lankan foreign minister-isa, Pakistan Ato Kilonser-i, iba ken o pa tawabangba kubok agitsü aser tatalokba ken o takaratiba nung bushisüngdangtsü atema jenjang agiba atema kanga pelaba lemsatepa liasü.

Maneni Sialkot nung amenoka aliba shishilembaba lokti tenteti USD 100,000 tenla agütsütsü sangdongba aser Priyantha Kumara kinungtsü nem itashia itasen agütsütsü nangzükba, Peiris-i pelashishia agizükogo.

Asür Priyantha Kumara'er chir ana tarutsü aser mapang shidak nung itsen agizüktsü koda tongtiba iba indang Sri Lanka sorkari kanga süoki ia agiba Minister Peiris-i metetdaktüsü.

Iba tatalokba dak sendakba nung Pakistani police aser Imran Khan-i, aibelena alirtem nem temerenshi tesashi agütsütsü nangzükogo.

Pakistan-i US aser China na tesendaktepyanglushitsüner: Imran

Islamabad, Luchii/December 10 (Agencies): Tir Joe Biden indang democracy summit nung shilem agitsü jaokba magizükba sülen anogo ka lir Pakistan Ato Kilonser Imran Khan-i Brehostibarnü ashiba agi, political bloc ka nung shilem ka akümtsü atema par linük tejangraba kecha mali, saka iba melena US aser China na tsüngda tesendaktep yanglushitsü asoshi shilem ka aginer.

"Tensa ya Cold War tasen ka dangi odar aser bloc tem tentetdar. Pakistan-i takok tashi iba amala bloc tentetba nokdangtsü merangtsüla, kechiyong onok iba amala bloc nung shilem magitsü," ta Khan-i Islamabad Conclave 2021 nung o jembiba mapang ashi.

US-i virtual democracy summit nung shilem agitsü atema jaokba ajanga Pakistan jenjang mejungi aküm, kechiyong Washington-i China

tenüng nung Beijing masü saka Taiwan jaoka liasü. Islamabad-i parnok nem teyari agütsür tongtiba China mejashidaktüsüner.

Regional tetsükdaktsütem dak sendakba nung Khan-i, tebilemtsü tulutibaji Kashmir ken o lir, ta ashi. Paisa, pai aniba sorkari yimjung asoshi India den tongtepratepdangogo, ajisüaka telangzüba tajung magütsü, ta ashi.

Kasa mapang nung BBC den sensaksemba mapang Pakistan NSA Moeed Yusuf-i, Gwadar port nung par linüki China nem military base amenoktsü atema kecha maongka magütsü, ta ashi. "Pakistan nung China nung indang economic base tem amenoka lir, koba linük mashi kati semdangtetsü... kasaji US, Russia aser Middle East nema maongka agütsüogo. Onok linük ajak den sendaktepa alitsü lapoka dang lir," ta Moeed Yusuf-i ashi.

Saudi embassy adena aoba lenmang 'Jamal Khashoggi Way' jatsütsü

Washington, Luchii/December 10 (Agencies): Saudi Arabia embassy süia aoba lenmang nungja "Jamal Khashoggi Way," agi melentsütsü telemtetba agiogo. Washington city council nung vote agitepba sülen, sorkar agent temi tepsetba Saudi nung osangbener tenüng nung iba lenmang nungja agütsütsü telemtetba agia liasü.

Mongolbarnü vote agütsütepba mapang embassy aser Watergate complex na adena süiba meter 213 talang New Hampshire Avenue nungja Khashoggi tenüng nung jatsütsü mulungtepba agizükogo ta ashi. Khashoggi ya Turkey nung metepset tsüngda Washington Post nung inyaka liasü.

"Jamal Khashoggi ya democracy, human rights aser rule of law ajungkettsü atema inyakba nisung ka liasü," ta council-i ashi.

"Saudi Arabia Royal Embassy jakdang lenmang Jamal Khashoggi tenüng nung

jatsüba ajanga pa atema memorial ka yanglutsür koba kodanga mimbangtsü makoktsü," ta council-i ashi.

Khashoggi shibai Saudi chubayimli aija liasü, pa Turkey tsür ka den kibong akümtsü atema paperwork benoktsü asoshi Istanbul nung Saudi consulate-i aoba mapang 2018 küm October 2 nü tepset.

Pa tepsetertem ya Crown Prince Mohammed bin Salman den sendaktepa aliba nisungtem liasü. Pai Khashoggi tepsettsü atema tetuyuba agütsü ta shia Western intelligence temi Salman aija arudar.

Council-i agizükba bill ya Washington Mayor Muriel Bowser-i sign asütsü aser US Congress-i kecha tenokdangba magütsütsü imlar.

2018 kuma Washington-i, Russian embassy kima lenmang ka Vladimir Putin anemer Boris Nemtsov tenüng nung jatsü, shiba iba masüdag küm asem tejakdang Moscow nung tepseta liasü.

Australia-i Jan nungi tenzuka tanurtem nem vaccine agütsütsü

Sydney, Luchii/December 10 (Agencies): Australia nung taruba küm January 10 nü nungi tenzuka tanur arishi küm 5 nungi 11 tsüngda alirtem nem COVID-19 vaccine agütsütsü, ta Ato Kilonser Scott Morrison-i Hokolbarnü metetdaktüsü. Vaccine agütsütsü temelaba anguba sülen pai iba osang sangdonga liasü.

"Iba osang ya linük nung kibong million aika atema osang tajung ka asütsü, shirnok pei chirnurtem nem vaccine agütsütsü atema maongka atadar," ta Morrison-i ashi.

Canada nungi clinical data asadanga sülen linük indang

vaccination advisory group-i, dose ana tsüngda hopta ti tetsüngda iter agitsü tetuyuba agütsü, koba wara tali prokshia ora hopta asem sülen agütsütsü akok.

Vaccine asadangertemi Moderna vaccine asadanga aliba mapang mezüngbuba phase nung Pfizer vaccine agütsütsü. Iba dak sendakba nung taruba hopta telemtetba ka agitsü imlar.

COVID-19 vaccine timtiba agiba linüktem rongnung Australia züngoksemba sülen booster shots takaratiba nung agütsütsü inyaktepba mapang tang iba osang sangdongogo. (Maneni tapak 9 nung...)



Myanmar kubok Mandalay yimti yimtung tazung aliba noksa nung angur. Hokolbarnü International Human Rights Day amungba anogo Mandalay yimti yimtungtem azung azünga aküm kechiyong nüburttem aikati "silent strike" nung shilem agia liasü. Iba ango office, dokan aser restaurant tem aika melapok aser military-i sorkar atsüngba anema nüburttemi pei kidang nungi mayazüki longkak ait.

MulungnenASOBA
26/11/1965ASÜBA
28/10/2021

Onoki teti meima aliba obala, asür **O. Imyapangba**, pa mapang talangka shiranga aser iba akümüli nungi pila orr onok mangyim jashi nung alidang, kija, kibong, kinunger, kiyong-kidanger, yimer, metemer, arogotem aser tentet balala shirnokisa temeim sayua nübu, rongsen, tenla tulu agüja aser sarasadem ajanga nungita yariogo, nenok ajak dang ozüi pelaba lemsateper.

Nenok kija, kibong aser lokti ajak tenung teta ozüi pelar ta meshitetaka, asen Tulusang aser Temoatsür Tsüngremi nenok temeim aser mapa tajung asoshi molamoshia moajangma ta ozüi sarasademtsür.

- Temeim kinungsü, jala-jabasotem, semchir, kinunger aser anükapangtem

Office of the

Longsa Sungmangsanger Telongjem Mokokchung
TENÜNGSANG AGÜTSÜR

1. Wb. Sodangsoba & Wt. Nungsangkala, dena jabaso Wb. Likoknungden Jamir, pai pei wadang nung temaba menden (Sub-Registrar of Co-Operative Societies Govt of Nagaland)
2. Lt. Imtisosang & Wt. Imsentula tena jabaso Wb. Noksangtemba Pongen, pai pei wadang nung temaba menden (Sub-Inspector of Police DEF Mkg), tongtetba asoshi Longsa Sungmangsanger Telongjem Mokokchung-i dena nem konang tetushi agütsür. Maneni tarutsü nung Tsüngremi dena wadang nübur tenzükba nung anema aliba arishi moajang ta ozü sarasadem.

Sd/-
Alemtoshi
PresidentSd/-
Moatoshi
Gen. Secy.**METETDAKTSÜR**

Dimapur Unger Fellowship Calendar nung aliba ama küm tatem sentongji akatsü. Anungji sensosanger aser anükapang ajak arua atentsü mepishia metetdaksür.

**Kibubar wadang nung
M. Chuba. Jamir.**



CENTRAL COUNCIL FOR RESEARCH IN AYURVEDIC SCIENCES
(Ministry of Ayush, Government of India)
J.L.N.C.A.H. Anusandhan Bhawan,
No. 61-65, Institutional Area, Opp. 'D' Block, Janakpuri,
New Delhi-110058

Advertisement 2021**CCRAS Post Doctoral Fellowship Scheme
(CCRAS PDF Scheme)**

Tasa tajung alir researchers tasentem jangjatetsü aser parnok nem multidisciplinary area balala nung training aser research maongka agütsüsü atema Ministry of Ayush, Government of India indang autonomous tentet **Central Council for Research in Ayurvedic Sciences (CCRAS)**-i tawa **"CCRAS Post Doctoral Fellowship Scheme"** tenzüktsüogo.

Iba scheme yagi researcher tem 'mentored' nungi 'independent research' career agi melentsüsü nükjindong yur achaayanger. CCRAS-i nungtugu tentet talisa CSIR, ICMR, DBT, National Institutes, recognized Universities aser Ayush indang National Institutions nung science discipline dak sendakba indang Ph.D. holders aser Ayurveda indang PhD/PG degree tasen nem küm shia iba ama fellowship ter (10) agütsüsü tebilemba lir. Institute/Centre nungdakba nung asadanga Director General, CCRAS ajanga item fellowship agütsüsü. CCRAS PDF Scheme, application form, undertaking aser full advertisement densema eligibility, age limit, tenure, remuneration, how to apply aser mode of selection etc indang tejangjatem metetsü asoshi temsüa alir tejangrartemi Council indang website www.ccras.nic.in nung tongtepretepsü akok.

davp 17216/11/0014/2122

Assistant Director Coord.

Australia-i Jan nungi... (Tapak 8 nungi...)

Australia nung arishi küm nung tanem tanemi timba 16 nungi temapur küm a odar. New South Wales state kong Sydney densema lir, iba state nung Hokolbarnü nisung 516 dak tashidak potetogo, koba ita ana tsüngda anogo ka nung nisung timba dak tashidak potetba asütsü.

Omicron variant ajanga timtem bener arutsüsü tsübuwa ketdangsürtemi nüburtem dang booster shot agitsü ajungshia arudar. Omicron variant agi atongertem ya Sydney yimti

Tang tashi nung Australia nung nisung 225,000 dak COVID-19 tashidak potetogo aser iba tashidak agi nisung 2,084 süogo.

DYF Season 3 sentong atsülanger

Dimapur, Luchii/December 10, 2021: Abilen nungi Onen Nenty (Brand Ambassador Nagaland Tourism), Sentimeren Pongen (Student Leader/Social Activist), Mengu Suokhrie (Artist) aser Rhanchobeni Ezung (Social Worker) külemi tangokba noksa ka yangi angur.

Dimapur, Luchii/December 10, 2021 (TYO): December 04, 2021 nü Oting yimtsüng nung tai malir taküm samartem bilemtetba den Konyak nunger den mangyim jashi lemsatepba aser parnok nungitta yariba shilem ka ama, Dimapur Youth Festival Season 3 tayongertemi DYF Season 3 sentong agitsü anogo atsülanger metetdaksür, koba December 13, 2021 nungi DDSC Stadium nung DYF Season 3 agitsü renemer liasü. Ajisüaka, iba lendong nung asürtem bilemtetta Urban Hatt, Supermarket nung December 15, 2021 aonung 6:00 ako nungi tribute concert ka ayongzüksü. December 04, 2021 nü Tiru

asur Oting yimtsüng tsüngda atalokba lendong nung tai malir taküm samartem bilemtetta, iba concert agitsü aser ticket ayokba nungi aruba sen ajak asür kibong/adianu/züngsem nem agütsüsü. Iba tribute concert nung, band talisa Fat Circus, THE Paradigm Shift, Few Good Men, The Sonorous aser Insummer den solo artist talisa Moko Koza aser tanga Artists tasen aikati shilem agitsü terenemba lir. Konyak Union Dimapur, President-i iba sentong nung jembitsü aser asürtem bilemtetta akhüm agütsüba den sarasadem mapang agitsü. Taoba DYF sentong ama, Dimapur kübok kin balala tsüngda

tesendaktep akangshidaksüsü, telongjem aser yimji-yimjung lidaksüsü nükjindong nung iba festival ayongzükur.

Iba sentong ajanga 'kin tsüngda tebandang kecha melii lanurtemi telongjem tanela nung shilem agidaksüsü' nükjindong nung artist tasen nem sabang agütsüsü.

* **Organizing committee züngsemtem:**

- * Mengu suokhrie - Artist,
- * Onen Nenty - Brand Ambassador Nagaland Tourism,
- * Rhanchobeni ezung - Social Worker,
- * Sentimeren Pongen - Student Leader/Social Activist.

Phek District Hospital küm 50 ajungba benjungmung amung

Phek, Luchii/December 10, 2021 (TYO): Hokolbarnü, Phek District Hospital küm 50 ajungba benjungmung munga liasü. Iba sentong nung alakteta tejaoker ama Kuzholuzo Nienu, MLA denogo, ta sangdong ka ajanga metetdaksü.

Iba sentong nung Nienu-i, küm 50 ajungba benjungmung anogo ya kanga dang tongtibang, kong nüburtem ajungtsü atema taoba mapang inyakba bilemtettsüla, pei tebilemba shisadangtsüla aser tanaben bendanga agütsür inyaktsüla, ta ashi. Tang Covid-19 wara dak sendakba nung pai nübur nem

tekümdangtsü agütsü aser tali kümdangshia alitsü asoshi ajungshia liasü.

Nübutem iba tesashi wara nungi kümzuka ayutsü asoshi bendanga agütsür meranga inyakba atema Nienu-i faculty züngsem dang pelaba metetdaksü.

MLA Khzhienyi Khalo-i staff dang pelaba metetdaksü aser pei dak aketba sempet tajungtiba amshia nübur tenzüksü asoshi pai mepishia liasü.

Kasa sentong nung, Phek, Deputy Commissioner Razouvolie Dozo-i o jembia. Iba sentong nung Dr. Khriezotuo

Paphino, CMO Phek menden liasü aser Lodino Yoho, ANS DHP-i sarasadem. Dr. Avile Zao, M.S, Dist. Hospital Phek-i telok pela agizük aser Golden Jubilee Choir DHP-i ken ka aten. Dr. Ngopelo Keviechu, SMO ajanga District Hospital Phek indang putiotsü tongmelang agi ashi.

Iba sentong tembanga Dr. Wemeri Khutsoh, Convenor, Jubilee Committee-i tepela anküp o jembia. District Hospital Phek Hon Jubilee aser iba benjungmung chiyongtsü atema Rev. Dr. Thupuciyi Khesoh, Pastor PTBC-i sarasademtsü, ta kasa sangdong nung shia lir.

Wokha nung Human Rights Day mungogo

Wokha, Luchii/December 10, 2021 (TYO): Hokolbarnü, Human Rights Day anogomung nung '16 Day Activism Against Gender Violence' shibangba sentong agia liasü. Deputy Commissioner Conference Hall, Wokha nung "End Violence against Women Now" omen nung ajemdaker iba sentong agiogo, ta sangdong ajanga metetdaksü.

Iba sentong nung SDO (C) Wokha, Selemla S. Sangtam-i, Activism sentong agiba mapang tetsürtem anema mapa tamajung inyakba nung tekümdangtsü osang sangoktsüsü atema DLCW-MSK aser Saksi-One Stop Centre nungi volunteer temi 'door to door campaign'

ayongzük, ta ashi.

Tetsür aser tebur tsüngda tebandang malitsü/maongka kasa agütsüsü asoshi pei nem agütsüba temeden metetta ola adoktsüla aser lokti nung tetsürtem atema temelenshi tajung adokdaksüsü asoshi maneni meranga inyaktsüla ta lai tetsürtem ajungshia liasü.

Longjemer inyak nungang mapa tamajung samatsüsü akok, ta Medical Officer, Nyiro Dr. Wonchibeni T. Murry-i ashiba mapang lai tetsürtem dang, pei temang nung timtem aliba aser shisabulutem metetdaksüla, ajiasünungang teyari agütsütettsü, ta ayongzük.

Panel Lawyer, Wokha DLSA, Advocate W. Gracy Ezung-i, tetsür nem agütsüba

temeden balala indang metetdaksü.

Kasa sentong nung, Ministry of Skill Development and Entrepreneurship GOI kübok District Skill Development Officer, Wokha for Mahatma Gandhi National Fellowship, Anuranjan Singh; Lotha Eloe Hoho nungi teshimtet nübu, Central Administrator Saksi-One Stop Centre, Renthunglo Kikon aser Secretary Indian Red Cross Society, Wokha Branch, Dr. Zumomo Ovung nungeri jembio.

Iba sentong nung Case Worker Saksi-One Stop Centre, Thungbeni Kikon menden liasü aser Women Welfare Officer DLCW-MSK, Dr. Wonchano Enny-i tepela anküp o jembia, ta kasa sangdong nung shia lir.

2buba All Nagaland Open Volleyball Tournament tenzükogo



Dimapur, Luchii/December 10, 2021 (TYO): Horua Welfare Society ajanga ayongba '2nd All Nagaland Open Volleyball Tournament' ya Hokolbanü Indisen Village Ground nung tenzükogo, ta sangdong ajanga metetdaksü.

Iba asayamung lapokba sentong nung alakteta tejaoker ama Minister for Higher Education

& Tribal Affairs Department, Government of Nagaland, Temjen Imna Along dena liasü.

2nd All Nagaland Open Volleyball Tournament nung team 9 agi shilem agidar. Item team yamai alitsü:

- 1) Changtongya Volleyball Club,
- 2) MH-10 Kohima,
- 3) Elite Spikers
- 4) Volleyball for Peace Longsa

- 5) Kimpfüphe Volleyball Club
- 6) Ball Blasters Dimapur
- 7) JNS Lake View Colony Volleyball Club
- 8) Peak Young Spikers
- 9) Japukong Youth Organization

Maneni, iba asayamung final match ya Honibar (11.12.2021) aonung 6:30 nungi tenzükaga asayatsü, ta kasa sangdong nung shia lir.

Satakha nung SASCA asayamung tenzükogo



Suruhoto, Luchii/December 10, 2021 (TYO): 12buba Satakha Area Sports and Cultural Association (SASCA) men's football aser women's volleyball asayamung ya December 7, 2021 nü tenzükogo, kong G. Kaito Aye, Minister for Agriculture & Cooperation tetushi tesemdang ama jaoka liasü, ta sangdong ajanga metetdaksü.

Kaito-i, saisaponger ajaki shilem agitettsüsa mesüra saisaponger timba anioxtsü atema tarutsü nung saisapong

timba bendenloxtsü asoshi asayamung tayongterem dang mepishi.

Asen taküm nung saisapong ajanga nungdakba aser tongtibang shilem ka agir; aser ibaji ajanga temang anepalutsü, anema alitsü asoshi tajangzük agütsür aser iba den külemi career yanglutsü maongka tajung agütsür, ta Kaito-i shisem.

Iba sentong nung Rev. Kughato K. Chophi, Pastor STBC-i Tsüngremer temoatsü meshizüka sarasademtsü aser tenla tajung agütsüba atema

SASCA President Kiyeto Zhimo-i, Director IPR, Er. Z Tokishe Sema, Sr. Treasury Officer, Khekaho T Aye aser Proprietor Hiyo Betoka V Swu nunger dang pelaba metetdaksü.

Shoipu yimertemi sobaliba tsüngsang - 'AphiloKuwo' sayu aser Bolly Chophi-i ken ka aten.

Maneni, Oting lendong nung tai malir Konyak nunger taküm samartem nem akhüm agüja, iba asayamung nung team ajungai ribbon tanak nailoker/mesüloker shilem agitsü lemtet, ta kasa sangdong nung shia lir.

IOC-i IOA dang election agitsü tetuyuba agütsü

New Delhi, Luchii/December 10, 2021 (Agencies): Delhi High Court nung ken o ka bentettsü aliba dak sendakba nung International Olympic Committee (IOC)-i Indian Olympic Association (IOA) dang December 19, 2021 nü agitsü aliba elections tanga anogo kati belentsü asoshi tetuyuba agütsü, saka kasa anogo (19.12.2021) nung General Assembly agitsü asoshi iba tentet dang mepishi.

IOA constitution nung nungdakba temzüngtem melenshiba sülen, sangküm January ita matemdang election agiadoktsüla, ta IOC-i IOA president Narinder Batra dangi züluba shidi nung shia lir.

"Tangba tensa asadanga, Court tetuyuba ajanga mezüng renemba ama December 19, 2021 nü IOA elections magitettsü. Ajisüaka, IOA General Assembly ya election dak sendakba nung masü tanga onük benoka December 19 nung agitettsü akok ta onoki angatetter," ta IOC-i züluba shidi nung shia lir.

"Küm pezü nung khen election agitsü tetuyuba, IOA Constitution aser Olympic Charter nung anidaka, Elective general Assembly ya akok tashi takaraba nung agitsü asoshi anogo ka lemtettsü aser temenoba agia sangküm January tatem tashi nungbo iba election agitsü," ta IOA-i ashi.

IOA sangdong ka nung, tebilemstü tulubaji IOA

constitution indang clause 11.1.3 nung restrictive provision agüja alibaji lir, koba president aser secretary General indang post atema candidate tem mezüng kasa office nung inyakdanga alir mesüra IOA indang Executive Council pungo nungi mashi ka nung teshimtet züngsem asütsüla, ta ashi.

"Court telemtetba onoki agizüker. Ajisüaka, iba ama institutional aser telung onüktem jembitsü aser IOA telungtet nung item onük bentettsü makok," ta shidi nung shia lir.

Constitution dak sendakba temzüngtem nung tim yimya agi anidaksü aser temelaba agitsü atema IOC dangi abentsü asoshi IOC-i jangja jangjaa metetdaksüogo.

Ayamo-i 1buba Winter Open Air Gun Shooting kokogo

Wokha, Luchii/December 10, 2021 (TYO): Brehostibarnü (09.12.2021) Air Gun Sporting Association of Nagaland (ASAN)-i 1buba Winter Open Air gun Shooting Competition ayongzük, ta sangdong ajanga metetdaksü.

Ayamo L. Khuvung-i 1buba Airgun Shooting Competition takok angu. Kasa tetoktepba nung M. Nyamo Odyuo aser Bankathung nati tanabuba aser tasembuba jenjang ajangzükter. Par asem dak alaka, iba tetoktepba nung shilem agir nisung tenet nem consolation prize agütsü, kong senpet aser certificate dena lir.

Iba sentong nung alakteta jaoker, District Forest Officer, Wokha, Suman WM Sivachar, IFS-i, headquarter ama Wokha shimba aser iba asayamung takok ngua ayongzükba atema ASAN dang pelaba metetdaksü.

Suman-i, wadang balala nung takok angutsü asoshi Naga lanurtemi dang temulung agüja inyakra itemji ajangzüksü asoshi parnok dak sempet/tashi lir aser asayamung mashi ka nung

takok ngua tejakleni aotsü asoshi pei dak temulungtetba alitsüla aser bendanga agütsür inyaksüla, ta ashi.

Kasa sentong nung SP Wokha, Menangmeren Ao tetushi tesemdang ama dena liasü.

Pai, khashishiba ya saisapong tajung ka lir, ta ashi aser iba asayamung nung district balala nungi nisung aikati shilem agiba angudang pelar, ta pai lemsatop.

ASAN President, Ajamo Odyuo-i telok pela agizük aser Manenkaba-i ASAN tentetba indang telok dang metetdakja liasü.

Maneni, District Forest Officer, Wokha, Suman WM Sivachar IFS-i ASAN Website lapoktsü. Iba Air Gun khashishiba tetoktepba nung Kohima densema nisung 43 agi shilem agiogo. Iba sentong nung, Oting lendong nung asürtem bilemtetta teloki minute 2 süngjema mokremer akhüm agütsüba den ketdangsurtem aser shilem agirtemi Black armband inoker iba asayamung agiogo, ta kasa sangdong nung shia lir.

1buba ZOAN Badminton Tournament tenzükogo



Peren, Luchii/December 10, 2021 (TYO): Hokolbarnü, Indoor Stadium, Jalukie nung 1buba Zeliang Officer's Association Nagaland (ZOAN) Badminton Tournament lapokba sentong agia liasü, kong alakteta tejaoker ama Executive Secy. Zeme Baptist Church Council, Rev. Izieteilung Terieng aruagi denogo, ta sangdong ajanga metetdaksü.

7th General Conference shilem ama ZOAN ajanga iba asayamung ayongzükter.

Iba asayamung ayongzüksü asoshi maparen takok ngua achaayangba atema Rev. Izieteilung Tereing-i ZOAN dang pelaba metetdaksü.

Pai ashiba agi, Peren District nung Zeliang Officer tem kanga dang tia taka ta ashi aser pei lima aser nüburtem kümzükaga ayutsü asoshi meranga inyaksü pai ajungshia liasü.

ZOAN ketdangsur aser tanga tongtibang nübutem matsüngdang Rev. Tereing-i iba asayamung tenzüksü.

Iba sentong nung, EAC Peren Hq., Ihoilung Chuilo, NCS menden liasü aser Matui N. Hau-i ken ka aten. Iba sentong tembanga District Surveillance Officer Peren, Dr. Hedungkiebe Rao-i tepela anküp o jemi, ta kasa sangdong nung shia lir.

BILEMDANGANG

"Lendong sülen temulung meyipjerji lendong kilir."